

TSA MORAORAO TJENA: LETSHOLO LA PATLO LE KGAPO MAPATLELONG A MOFUMAHADI MKHIZE

Tshwane, 26 Pudungwana 2024 — Ditshebeletso tsa Lekgetho tsa Afrika Borwa (SARS) di motlotlo hotsebisa ka kgatelopele e bonahalang e mabapi le maiteko a rona a ho lwantshana le ho qoba ho lefa lekgetho mmoho le ketso tsa bonkowane tse kgellang fatshe ikonomi ya naha ya rona. Karolo ya Lehae ya KwaZulu-Natal ya Lekgotla le Phahameng la Durban le fane ka taelo ya poloko mmoho le waranti ya patlo le kgapo nyeweng e pakeng tsa Khomishenara ya SARS le Shauwn Mkhize mmoho le Ba Bang.

Qeto ena ke mohato wa bohlokwa o ikamahanyang le maikemisetso a mawala a SARS a ho etsa hore dintho di be thata le ho ba ditjeo tse hodimo bakeng sa balefalekgetho ba etsang ka boomo ho ikamahanya le diketso tsa bonokwane. Dilemong tsa ho feta SARS haesale e ntse e fuputsa le ho lomahanya meno hodima indasteri ya kaho ka sepheo sa hore le yona e ikobele melao ya lekgetho.

SARS e phethahatsa dipehelo tse ka hara Molao wa Taolo ya Lekgetho wa Nomoro ya 28 wa 2011, ka ho qolleha karolo ya 163, e mabapi le poloko le tshireletso ya thepa. Ketsahalo ya moraorao tjena ke mohato o le mong wa e mengata moo SARS ka tshebedisano le Ditshebeletso tsa Sepolesa sa Afrika Borwa mmoho le Bolaodi ba Diphuputso tsa Bonokwane ba Mantlha (Hawks), wa ho sireletsa botshepehi ba mokgwatshebetso wa rona wa lekgetho.

Ditaelo tsena di fumanwe ka sepheo sa ho thibela ho nyamela ha thepa e fetolelwang tjheleteng, e leng se ka sitisang pokello ya makgetho, le ho sireletsa bopaki bo mabapi le ho se ikobele tefo ya lekgetho ho bapa le melao ya lekgetho jwalokaha e phethahatsa ke Khomishenara ya SARS.

Khomishenara ya SARS, Edward Kieswetter, o lebisitse diteboho tsa hae ho ditheo tsa phethahatso ya molao — Ditshebeletso tsa Sepolesa sa Afrika Borwa, di-Hawks, mmoho le ditho tsa SARS — ka tshebedisano ya bona eo e leng mohlala o atlehileng ho phethahatsa hlahlobo ena tlasa boemo bo thata.

Khomishenara o boletse hore SARS e keke ya qaeqea ho phethahatsa thomo ya yona, ntle le tshabo, leeme kapa ka tsela e inkelang diqeto, ho sa natswe maemo a motho setjhabeng. Ha ho motho ya phahametseng molao, kahoo ho bohlokwa haholo hore SARS e sebetse ka thata le ho netefatsa hore bohle ba ikobela boitlamo ba bona ba molao. Letsholo la kajeno la patlo le kgapo le tlameha ho lebisa molaetsa o totobetseng ho bohle hore ditheo tsa phethahatso ya molao di tla nka mehato ho emisa tlhokeho ya molao. Ba kotsing ya ho utlwiswa bohloko setjhabeng sa rona, baholo ba rona mmoho le bana ba tshepetse mmusong ka tsela ya makgetho hore o ba lwanele bofumeng, tlhokehong ya mesebetsi le tlaleng. Ba hanang ho ikobela molao ka boomo ba la kopana le pela di falla.

Ho fumana lesedi le fetang lena, ka kopo ikopanye le SARS ho SARSMedia@sars.gov.za.